



Panabang na Gikan sa Kahitas-an

Tinipon ni Watson Goodman

Dili kon Baligza

PANABANG NA GIKAN SA KAHITAS-AN

An basahon na “PANABANG NA GIKAN SA KAHITAS-AN” amo an tinipon na mga birsikolo nan Bibliya na tagtipon obos sa mga oyohan na tagsoyat. Ako nagtoo na an marazaw gazod na komintaryo nan Bibliya amo ra an Bibliya mismo.

An Solti nan Dios “gikan sa kahitas-an” sanan makatabang gazod ini sa mga kasingkasing na taggotom sanan tag-ohaw sa pagkamatarong. An Ginoo magpakita sa iza kaogalingon ngadto sa tawo sanan maghatag nan Iza kalipay sanan kalinaw sa magtotoo. Kon an tawo maghinolsol, magbiza sa iza saya sanan magtoo sa iza kasingkasing kan Ginoo na Hisos na amo ra an makalawas, mosoyod si Hiso-Kristo sa iza kinabohi. Nasinati ko ini nan toig 1937, sanan sogod nan iton waya ko gazod bogtoa inin katingayahan na pagpakigkaiban sa Ginoo. Ogsa nagdasig ako dimo sa pagtogyan nan imo kinabohi ngadto Diza na amo an imo Maglowasay sanan Ginoo. Hinanga ini KOMAN kon waya mo pa ini mahinang.

—Watson Goodman (1920-2002)

AN KINAYOZAG NAN DIOS

1

Tagpakita 1:5

Si Hiso-Kristo amo an sinaligan pagsogilon kon ono an tinood na gikan sa Dios. Siza an ona na nabohi gikan sa lobnganan. Siza amo an mohari sa bisan sin-o na hari dinhi sa kalibotan. Dazigon siza kay dako an kalooy niza dato. Siza an nagpaawas nan iza dogo dakan malibri kita sa ato mga saya.

Hirimiya 31:3

An Dios nan ona panagpakita dato, na naglaong: wayay kataposan an ako pagkayozag dimo ogsa tagpadazon ko an ako pagkaminomanon dimo.

Howan 3:16

Dako gazod an kalooy nan Dios sa tanan mga tawo dinhi sa kalibotan, kay taghatag niza an iza isa ra na bata, dakan an bisan sin-o na motoo diza dili madaya ngadto sa impirno. Basta kay hatagan siza hinoa nan kinabohi na wayay kataposan.

Mga Taga Roma 5:8

Piro an Dios nagpakita nan iza kalooy dinhi dato gikan nan ini, bisan nan mga makasasaya pa kita si Kristo napatay pagsalinti dato.

2 AN PAGKA—DIOS NI HISO—KRISTO

I Timotiyo 3:16

Homan dili malalis na dako gazod an tagtago nan ato tagtoohan: An Dios nakit-an did-on sa lawas, nahimatod-an na matarong nan Ispirito, nakit-an nan mga anghil, tagwali sa mga kanasoran, tagtoohan dinhi sa kalibotan sanan nopanik ngadto sa langit.

Howan 14:9b, 10

“... An nakakita dako nakakita nan Ama. Kay ono man na no-laong man kaw, “Ipakita dako an Ama”? Kay waya kaw baza magtoo na ako ad-on sa Ama sanan an Ama ini dako? An mga taglaong

ko digo, waya nako ini ilaong sa ako kaogalingon na pagboot; timan-i hinoa na an Ama na naghoya sa soyod ko, siza an naghinang nan iza mga taghinang.

Howan 1:1 sanan 14

Sa sinogdan amo na an Solti, sanan an Solti kaiban nan Dios, sanan Dios an Solti. Sanan an Solti nahinang na tawo sanan tibo damo nohoya siza na pono nan pagkamahinatagon sanan nan kamatooran; sanan nakit-an namo an iza harianon na kapawa na nadawat niza kay siza an isa ra na bata nan Ama.

SI HISOS AN BATA NAN DIOS

3

Mga Taga Kolosas 2:9

Kay did-on diza naghoya sa lawas an tinood sanan kinatibok-an nan pagka-Dios.

Isayas 9:6

Kay an isa ka bata natawo para dato; an isa ka bata na layaki taghatag para dato, sanan an panggobirno iza pangabagahon; sanan ngayanan siza na Kahiboyongan, Magtambagay, Dios na Makagagahom, Ama na wayay kataposan, Prinsipin nan Kalinaw.

Lukas 1:35

An anghil notobag diza, Harian kaw nan Ispirito nan Dios sanan magpabilin an gahom nan Dios

did-on dimo tongod nan ini an bata na matawo ngayanan na Bata nan Dios, na wayay saya.

Matiyo 17:5

Nan nagsolti pa siza, may isa ka mabislaw na panganod na nolibot did-on sa taas dila sanan gikan sa panganod may tingog na naglaong, "Amo ini an ako Bata na pinayangga na nakalipay dako; manalinga kamo diza."

I Howan 4:15

Bisan sin-o an mosolti pagpakilaya na si Hisos amo an Bata nan Dios, naghoya an Dios did-on diza sanan siza naghoya kaiban nan Dios.

4 NOSOLTI SI HISOS DATO KON SIN-O SIZA

Howan 9:5

Mintras ini pa ako sa kalibotan, ako amo an kapawa nan kali-botan.

Howan 10:7

Ogsa si Hisos nootro paglaong dila na, Tinood gazod, maglaong ako digo na ako amo an pirta na agihanan nan mga karniro.

Howan 8:23

Nolaong siza dila na Kamo an taga-obos, ako an taga-taas. Kamo taga-dinhi nan ini na ka-libotan, ako dili kon tagadinhi nan ini na kalibotan.

Howan 11:25

Si Hisos nolaong diza na Ako amo an magbanhaway nan mga

patay sanan maghatagay nan kinabohi. An mosalig dako bisan kon siza mapatay, mabohi ra siza.

Howan 6:35

Homan, si Hisos notobag dila na Ako amo an pagkaon na nagha-tag nan kinabohi; an mokari dako dili gotomon, sanan an mosalig dako dili gazod ohawon.

Howan 8:58

Si Hisos nolaong dila, tinood gazod naglaong ako digo nan waya pa si Abraham matawo did-on na ako daan.

Howan 13:13

Nagtawag kamo dako na Maistro sanan Ginoo; sanan hosto kamo kay ako amo man iton.

Homan, si Simon notobag diza na Ginoo, tibook doyum an paghago namo piro wayay gazod amo nakoha! Piro kon amo ini an imo gusto ako ihoyog an mga baling. Nan nahinang na nila ini, ila nakoha an mahamok na isda; sanan nagkabosbos an ila mga baling.

—Lokas 5:5, 6

Matiyo 14:19-21

Homan, an mga nagpanon na mga tawo iza tagsogo pagpaingkod sa lopa na may mga sagbot. Nan nagkapot siza nan lima ka pan sanan doha ka isda, nohangad siza sa langit sanan nagpasalamat. Pagkahoman, iza tagpikaspikas an mga pan sanan taghatag

niza ini ngadto sa iza mga sinaligan, sanan an mga sinaligan amoy nanhatag nan ini ngadto sa mga tawo. Nangaon sila horot sanan nangabosog. Homan, ila taghipos an nabilin na dosi ka ayat na pagkaon.

Matiyo 20:30 sanan 34

Na, ini na koman may doha ka mga bota na nag-ingkod sa kilid nan dayan. Nan pagkabati nila na molabazay si Hisos didto, namag-singgit sila na naglaong na Ginoo, Bata ni Dabid, kaloy-i kami. Homan, si Hisos nalooy sanan iza tagkaptan an ila mga mata, sanan did-on dazon nakakita na sila sanan noiban diza.

SI HISO-KRISTO AMO AN MAGHINANGAY SANAN GINOO

Mga Taga-Kolosas 1:16

Kay gikan diza taghinang an tanan mga botang, na ad-on sa langit sanan ini sa lopa, makit-an sanan dili makit-an, bisan an mga harianon na katongdanan, kon gahom, kon pamonoan kon pagpamonto—an tanan mga botang taghinang gikan diza sanan para diza.

Howan 1:3

Siza amo an maghinangay nan bisan ono na tagpahinang nan

Dios. Kay kon waya siza dili mahinang an bisan ono.

I Mga Taga Korinto 1:9

An Dios kasaligan sanan kamo tagpili niza na magpakigkaiban sa iza Bata na si Hiso-Kristo na ato Ginoo.

Mga Taga Roma 14:9

Kay para nan ini na tozo si Kristo napatay sanan nabohi pagisab dakan mahinang siza na Ginoo nan mga patay sanan nan mga bohi.

SI HISO—KRISTO AMO AN MOHOKOM NAN TANAN 7

II Timotiyo 4:1

Homan, an Dios sanan si Kristo Hisos amo an nagpamatoood nan ini na sogo ko dimo. Nahibayo kita na mobalik si Hisos dinhi kay siza an hari na mohokom nan tanan mga tawo bisan kon bohi pa an tawo bisan kon patay na.

Mga Taga Roma 14:10

Na, ono may paghokom mo sa imo lomon? O ikaw, ono may imo pagtamay sa imo lomon? Kay kita tanan moatobang ra sa hokmanan nan Dios.

Mga Hinang 10:42

Homan, siza an nosogo damo pagsolti ngadto sa mga tawo

sanan pagpahimatood na siza amo an tagsaligan nan Dios paghokom nan mga bohi sanan mga patay na mga tawo.

Mga Taga Roma 2:16

Nan iton na adlaw somaya sa ako Marazaw na Pahibayo, hokman na nan Dios an mga tinaogan nan mga tawo gikan kan Kristo Hisos.

Matiyo 25:32

Homan, atobang diza paniponon an tanan mga nasod sanan iza lainon an isa gikan sa isa singod nan magbantayay nan mga iha-zop na maglain nan mga karniro gikan sa mga kanding.

8 KALOWASAN GIKAN LAMANG KAN KRISTO

Howan 8:24

Ogsa taglang-an ta kamo na mangamatay kamo did-on sa izo mga saya kay mangamatay gazod kamo did-on sa izo mga saya gawas kon motoo kamo na ako amo si Kristo an Hari na tagpili nan Dios.

Howan 10:9

Ako amo an pirta; kon ad-oy mosoyod agi dako, siza malowas; sanan siza mosoyod sanan mologwa sanan makabagat siza nan makaon.

Mga Hibriyohanon 5:9

Pagkahoman ni Kristo pagto-man nan tanan mga nagostohan nan Dios siza na an Manlolowas

nan tanan mga tawo na notoo diza. Homan, siza an mohatag dila nan bag-o na kinabohi na wayay kataposan.

Howan 14:6

Si Hisos notobag diza na Ako amo an dayan, sanan an kamatooran, sanan an kinabohi; wayay bisan sin-o an makakadto sa Ama, gawas kon gikan dako.

Mga Hinang 4:12

Kay si Hisos siza ra an makatabang dato dakan malibri kita sa silot nan ato mga saya. Kay dinhi sa tibook kalibotan wayay lain ngayan na taghatag nan Dios sa mga tawo na makalibri dila sa silot nan ila mga saya.

KALOWASAN GIKAN LAMANG KAN KRISTO

9

Tagpakita 5:9

Homan, nanganta sila nan isa ka bag-o na kanta na naglaong na Angay kaw magkoha nan basahon na linokot sanan magtangtang nan mga tagpapakit na timri kay ikaw amo man an napatay sanan gikan sa imo dogo taglokat mo an mga tawo para sa Dios, gikan sa tanan mga pamilya, sanan sinoltihan sanan mga katawhan sanan mga kanasoran.

I Mga Taga-Korinto 1:30

Piro kamo tag-isa nan Dios kan Kristo Hisos, sanan taghinang niza si kristo na ato kahibayo. Gikan diza nahinang kita na ma-

tarong atobang sa Dios, sanan kita nahinang na katawhan niza na wayay saya sanan taghatagan kita nan kagawasan.

Mga Taga-Kolosas 1:12-14

Na, maghatag kamo nan mga pagpasalamat ngadto sa Ama na amo an naghinang dato na takos magsonod nan kabilin nan mga sakop ni Kristo na nagkinabohi did-on sa kapawa. Siza amo an naglowas dato gikan sa gahom nan kadogyom sanan nagbalhin dato ngadto sa tagharian nan iza Bata na pinayangga na amo an naglowas dato sanan nagpasaylo nan ato mga saya.

10 KALOWASAN PINAAGI SA DOGO NI KRISTO

Mga Taga-Ipiso 1:7

Taglokat kita niza gikan sa iza dogo sanan tagpasaylo an mga saya ta kay dako gazod an iza pagtabang dato.

I Howan 1:7

Piro kon kita magkinabohi did-on sa kapawa, kay ad-on man siza sa kapawa; na, kita may pakig-kaiban sa isa sanan isa, sanan an dogo ni Hisos na iza Bata naghinlo dato gikan sa tanan mga saya ta.

Mga Hibriyohanon 9:14

Ono pa kaha ka labaw gazod an mahinang nan dogo ni Kristo na gikan sa Ispirito na wayay kata-

posan nohalad sa iza kaogalingon na wayay lipa ngadto sa Dios dakan mahinloan an izo kaisipan gikan sa mga daan na hinang sanan magsilbi kamo sa Dios na bohi.

I Pidro 1:18, 19

Kamo nahibayo na waya kamo malowas gikan nan mga wayay poyos na pamatasan nan izo mga ginikanan, waya isab nan mga botang na mawaya ra singod nan kwarta sanan boyawan. Kondili nalowas kamo gikan sa mahal gazod na dogo ni Kristo, na singod nan nati na karniro na wayay tatsa kon lipa.

KALOWASAN PINAAGI NAN PAGTOO KAN KRISTO 11

Kay tongod sa kalooy nan Dios kamo nalawas gikan sa izo pagtoo kan Kristo; ini na kalowasan dili kon gikan sa izo kaogalingon na kahimoan, hatag ini nan Dios; dili tongod sa izo mga hinang dakan wayay bisan sin-o na magpasi-garbo. —Mga Taga-Ipiso 2:8, 9

I Howan 5:4

Kay kita na mga anak nan Dios nakadaog gazod kita nan mga saya dinhi sa kalibotan. An pagtoo nato kan Kristo amo an nakapildi nan ini.

Mga Taga Roma 5:1

Homan did-on sa pagsoyong nan Dios matarong na kita kay pagtoo nato kan Hiso-Kristo na

ato Ginoo nakoha na an pagkontra nato sa Dios. Homan, kita sanan an Dios nagkaisa na pagkinabohi.

Howan 6:28, 29

Homan, nolaong sila diza, Ono may kinahanglan namo hinangon dakan matoman namo an ipahinang nan Dios? Si Hisos notobag dila na An ipahinang nan Dios amo ini, na kinahanglan mosalig kamo diza na iza tagpadaya.

Howan 20:31

Piro ini tagsoyat dakan motoo kamo na si Hisos amo an Kristo, an Bata nan Dios, sanan pagtoo nizo, makaangkon kamo nan kinabohi gikan sa iza ngayan.

Salmo 103:11

Kay kon an langit arang ka taas gazod sa imabaw nan lopa, singod isab ka labaw pa gazod an iza kalooy sa mga tawo na nagtahod diza.

Salmo 103:17

Piro gikan sa wayay kataposan ngadto sa wayay kataposan an kalooy nan Dios did-on dila na nagtahod diza, sanan an iza pagkamatinoan sa iza mga saad ngadto sa mga anak nan mga anak.

Tito 3:5

Kita iza taglowas, dili tongod sa ato mga marazaw na hinang kon-

dili tongod sa iza kalooy, gikan nan iza paghogas dato sa ato mga saya sanan pagbag-o nan ato kinabohi nan Ispirito nan Dios.

Lamintasyonis 3:22-23

An dako na kalooy lamang nan Dios amo an nagpogong diza pagsilot dato. Labaw gazod an iza pagkamatinoan; an iza pagkamaloloy-on wayay paghopas kay kada masosoyom iza ini tagbag-o.

Salmo 108:4

Kay an imo kalooy labaw gazod ka dako sa imabaw nan kalangitan; sanan an imo pagkamatinoan noabot sa kapanganoran.

TAGTAWAG KITA NAN DIOS PAG-APIKI DIZA 13

Tagpakita 22:17

An Ispirito sanan an Pangasaw-onon naglaong, “Mokari kaw.” Sanan siza na nanalinga palang-a “Mokari kaw.” Homan, an tag-ohaw pakaria; an may tozo, paim-na nan wayay bazad na tobig na naghatag nan kinabohi.

Howan 7:37

Homan, nan kataposan na adlaw na amo an kinasomaran na adlaw nan pista, si Hisos notindog sanan nosinggit na naglaong na Kon may tawo na tag-ohaw, mokari siza dako sanan moinom.

Isayas 1:18

Mokari kamo koman, sanan tibon ta paghosay, naglaong si

Jehovah; bisan kon an izo mga saya arang gazod ka malipa, kohaon ko iton dakan arang na gazod kamo ka hinlo.

Matiyo 11:28

Kari dako kamo tanan na taghawozan sanan tagbog-atan kay papahowazon ta kamo.

Isayas 55:1

Hoy, an tagsatagsa dizo na tag-ohaw, mokari kamo sa tinood na tobig; sanan siza na wayay kwarta; kari kamo, magpalit nan tinood na makaon; Oo, kari na kamo pilia an tinood na bino sanan gatas na dili mapalit sa bisan ono pa na prisyo.

14 DILI AN TANAN TAWO MGA ANAK NAN DIOS

Pilipos 2:15

Dakan an izo mga kinabohi mahinlo sanan wayay ikasaway, mga anak nan Dios na wayay sazop did-on sa tonga nan mga kaliwatan na makasasaya sanan masinopakon, na sa tonga dila kamo nagsidlak singod nan mga bitoon sa kalangitan.

II Mga-Korinto 6:17, 18

Ogsa manlogwa kamo gikan dila, sanan maglain kamo gikan dila, naglaong an Ginoo, sanan azaw na kamo magkapot nan mga malipa; homan, dawaton ko kamo, sanan ako mahinang na izo Ama, sanan kamo mahinang na ako

mga anak na layaki sanan babazi, naglaong an Ginoo na Makagagahom sa Tanan.

Howan 1:12

Piro an tanan na nodawat diza, an tanan na notoo sa iza ngayan, sila taghatagan niza nan gahom na mahinang na mga inanak nan Dios.

I Howan 3:10

Makilaya kon sin-o an mga anak nan Dios sanan sin-o an mga anak nan zawa gikan nan ini: bisan sin-o na waya magdazaw nan iza mga hinang sanan waya malooy sa iza lomon, ini siza dili kon kanan Dios.

ONO AN TAGLAONG NAN DIOS MAHITONGOD 15 NAN MAKABAYONG NA IMNONON

Isayas 5:11

Alaot an mga tawo na mosazo pagbangon pagkamasosoyom, dakan sila mangabayong nan mga maisog na imnonon; Alaot adton magbaog sa tibook na doyom hangtod sila manginit sa bino.

Homan, klaro karazaw an mga hinang na gikan sa lawasnon na kinaiza na amo ini: pakighilawas, kalipa, pagbinogoy, pagsimba nan mga diosdios, pagpamarang, mga dinomtanay, mga pakigbingkil, panilos, kapongot, izaizahay, bayongbayong, mga kahilayan sanan iban pa na mga botang na singod nan ini. Pahibayoon ko kamo

singod nan ako na tagpahibayo dizo nan ona pa, na an mga naghinang nan ini na mga botanga dili makasoyod sa tagharian nan Dios. —Mga Taga-Galasya 5:19-21

Mga Taga-Roma 13:13, 14

Magbatasan kita na maligdong, singod nan adlaw, dili kon sa mga kahilayan, sanan mga pagbina-yong, dili kon sa pakighilawas sanan kalaw-ayan, dili kon sa pakig-away sanan pagpanilos. Maghaod kita hinoa nan batasan ni Hiso-Kristo, sanan azaw kamo paghona-hona kon onhon pagtagbaw an mga pangibog nan makasasya na kinaiza.

Markos 10:17b-21

...Marazaw na Maistro, ono may ako hinangon dakan maka-panonod ako nan kinabohi na wayay kataposan? Notobag si Hisos diza na naglaong na Ono may paglaong mo dako na marazaw? Wayay bisan isa na marazaw gawas nan Dios lamang. Nahibayo kaw nan mga sogo: Azaw pagbono, Azaw paghonay, Azaw pagpangawat, Azaw pagtistigos nan bakak, Azaw paglimbong. Magtahod kaw sa imo ama sanan ina. Homan, siza nolaong diza, Maistro, inin tanan ako na tagtoman sogod pa nan bazongbazong pa ako. Si Hisos, nan nagsoyong

siza diza, nalooy diza sanan nolaong diza na Koyang pa kaw nan isa na botang; Kadto na, ibaligza an imo katigazonan sanan an halin ihatag ngadto sa mga pobri, homan, makaangkon kaw nan kadato didto sa langit; sanan pagkatapos, mokaanhi kaw sanan moiban dako.

Matiyo 22:37, 38

Homan, si Hisos nolaong diza na Kinahanglan amoy kayozagon mo an Ginoo na imo Dios sa tibook mo na kasingkasing, sanan nan tibook mo na kayag sanan nan tibook mo na pangisip. Amo iton an labaw sanan ona na sogo.

Mga Taga-Ipiso 5:6

Azaw kamo pabongoy kan bisan sin-o gikan nan mga pangatarongan na wayay hinongdan, kay tongod nan ini na mga botanga an kapongot nan Dios moabot did-on sa mga tawo na masinopakon.

I Mga Taga-Korinto 6:9, 10

Nahibayo ba kamo na an mga dili kon matarong dili makapanonod sa tagharian nan Dios? Azaw kamo magpalimbong; wayay mga mayozagon pagpatozang nan kinayozag nan ila lawas, kon mga sinsimba nan mga diosdios, kon mga manhonay, kon mga bayot, kon mga kawatan,

kon mga boraho, kon mga palabayong, kon mga sinpasipaya, kon mga tolisan na makapanonod nan tagharian nan Dios.

Santiago 1:22

Hinoa kinahanglan tomanon nizo an tagpanolti kay kon aza ra kamo lamang manalinga, naglimbong kamo sa izo kaogalingon.

I Howan 3:7, 8a

Mga kabataan ko, kinahanglan wayay makalimbong dizo. Kon pirmi kamo naghinang nan marazaw ini tongod kay marazaw an izo pagkatawo singod diza na marazaw. An naghinang nan saya iza sa zawa; kay an zawa makasaya man sogod pa nan sinogdan.

18 AN SAYA NAGDAYA NAN KAMATAZON

Izikel 18:20

An tawo na makasaya amo an mapatay; an anak dili silotan kay nakasaya an iza ama; an ama isab dili silotan kay nakasaya an iza anak; an marazaw na tawo may primyo kay marazaw an iza hinang; an mayaot na tawo silotan kay makasasaya an iza hinang.

Mga Probirbyo 11:19

An marazaw gazod na tawo makaangkon nan kinabohi; piro an makasasaya na tawo makaangkon nan kamatazon.

Mga Taga-Roma 5:12

Nan pagpakasaya nan primiro na tawo na si Adan, an saya

nosoyod pagkanat sa tanan mga tawo. An saya nagdaya nan kamatazon sa tibook kalibotan, ogsa an tanan mangamatay kay an tanan nakasaya man.

Mga Taga-Roma 8:6

An pangisip nan isa na tawo na magpatozang nan iza mga kayozag na lawasnon mosangpot sa kamatazon na wayay kataposan; piro an pangisip na tagharian nan Ispirito mosangpot sa kinabohi sanan kalinaw.

An pag-isip nan mga mayaot na pangandoy morisolta nan mga hinang na makasasaya; sanan an saya morisolta nan kamatazon na wayay kataposan. —Santiago 1:15

Wayay sinogdan an ako kinabohi sanan wayay kataposan. Nan adton ona pa nagpakamatay ako homan dinhi nan pagsoyong mo nakakita kaw na mabohi ako hangtod sa kahangtoran. Ako amo an magponto kon kon-o mapatay an kada isa na tawo.

—Tagpakita 1:18

An Ama nayozaq gazod dako kay ako maghalad man nan ako kinabohi ngadto sa pagkapatay ko, sanan ako ra isab ini mabawi. Wayay tawo na makakoha nan ini gikan dako, basta kay taghalad ko ini sa ako kaogalingon na pagboot. May gahom ako paghalad nan ini sanan may gahom

ako nan pagbawi nan ini. Ini na sogo nadawat ko gikan sa ako Ama.

—Howan 10:17, 18

Kay an panolti na ako nadawat tagpasa ko ra isab digo kay pina-kamarazaw gazod ini; na si Kristo napatay para sa ato mga saya so-maya nan kasoyatan, na siza taglobong, na siza nabanhaw sa ika-toyo na adlaw somaya nan kasoyatan. —I Mga Taga-Korinto 15:3, 4

Homan, noapiki siza sanan tagkaptan an longon. Na, an naglahong nan ini nohonong. Homan, nolaong siza, Long, naglaong ako dimo na bangon. An napatay noingkod sanan nosogod pagsolti.

—Lokas 7:14, 15a

Diotironomiyo 5:7-21

Ako ra gazod an Dios na simbahon mo, wayay lain.

Dili kaw maghinang para dimo nan mga hininang na larawan, bisan sa ono na hitsora nan bisan ono na botang na adto sa taas nan langit, kon sa ilayom nan lopa, kon sa tobig sa ilayom nan lopa: Dili kaw maglohod dila, bisan magsilbi dila

Dili mo gamiton sa pagpasipaya an ngayan ni Jehova na imo Dios: kay dili kilay-on ni Jehova na wayay saya an magpasipaya nan iza ngayan.

Saologon mo an adlaw na ipahowazay dakan sa pagtahod

nan ini, singod nan tagsogo ni Jehova na imo Dios. Magtrabaho soyod sa onom ka adlaw sanan hinangon mo an tanan mo na trabaho. Piro an ikapito na adlaw, amo an adlaw na ipahowazay para kan Jehova na imo Dios.

Dili kaw magpatay.

Dili kaw manhonay.

Dili kaw mangawat.

Dili kaw magtistigos nan bakak batok sa imo isig ka tawo.

Dili kaw isab masina sa asawa nan imo isig ka tawo; dili kaw isab masina sa bayay nan imo isig ka tawo, bisan sa iza lopa, bisan sa iza masogo na layaki, bisan sa iza

masogo na babazi, bisan sa iza
baka, bisan sa iza asno, sanan sa

bisan ono na botang na kanan imo
isig ka tawo.

DILI KAW MAKATAGO GIKAN SA DIOS

21

Lukas 8:17

Kay wayay botang na nasalim-
dan na dili mahipakita, sanan
wayay botang na natago na dili
mahibayoan.

Salmo 139:8 sanan 12

Kon mopanik ako pasingod sa
langit, adto kaw didto. Kon sa
dapit nan mga nangamatay ko
hinanga an ako higdaan, adto kaw
didto...Bisan ngani an ka-
dogyom dili makatago gikan
dimo, kondili an doyom mopawa
singod sa kapawa nan adlaw. Did-

on dimo an kapawa sanan ka-
dogyom pariho ra lamang.

Hirimiya 23:24

Ad-on bay isa na makatago nan
iza kaogalingon sa mga soyok sa
pagkaagi na dili ako makakita
diza? naglaong si Jehova. Dili ba
napono ko an langit sanan lopa?
naglaong si Jehova.

Probirbyo 15 :3

An mga mata ni Jehova ad-on
sa kada dapit, nagtan-aw nan mga
tawo na mayaot sanan nan mga
tawo na marazaw.

AN WAYAY KATAPOSAN NA SILOT NAN MGA MAKASASAYA

II Pidro 3:7

An iza mga solti na taggamit niza nan paghinang nan kalibotan amo isab an taggamit niza nan pagtagana nan kalangitan sanan kalibotan para sa adlaw na silotan na niza an mga tawo na dili kon diosnon. Homan, mahorot ini sila pagpangasonog

Matiyo 18:8

Pananglitan, kon an imo alima kon siki amo an makadayahig dimo nan imo pagpakasaya, otda sanan ilabak ini gikan dimo; kay marazaw pa dimo no makasoyod sa kinabohi bisan popoy kon

bakol, kay sa may doha kaw na alima kon doha kaw na siki piro ihoyog didto sa kayazo na wayay kataposan.

Matiyo 13:41, 42

Ako an Anak nan Tawo magpadaya ra naz-an nan ako mga sinogo na tagalangit sanan ila tiponon sanan hakoton pagpalogwa sa iza tagharian an tanan hinongdan nan pagpakasaya sanan an tanan na mga naghinang nan mayaot, sanan ila ilabak ini sila ngadto sa hornohan na naglaga; didto an mga tawo manhaza sanan mangagot nan ila mga ngipon.

II Mga Taga-Korinto 5:10

Kay kita horot kinahanglan mangatobang sa hokmanan ni Kristo, dakan an kada isa magdawat somaya nan nahinang nan iza lawas, marazaw iton kon mayaot.

II Pidro 2:9

Na, an Ginoo mahibayo maglowas nan mga tawo na diosnon gikan sa mga tintasyon, sanan magpadazon pagsilot nan mga makasasaya kotob sa adlaw nan paghokom.

I Howan 4:17

Kinahanglan tinood an pagkayozag ta sa Dios dakan naz-an sa pag-abot nan tirmino na iza

pahamtangan an mga tawo nan silot sa ila mga saya wayay kahadlok nato nan pag-atobang diza kay nan dinhi pa kita sa kalibotan nohaod kita sa kinaiza ni Kristo.

Mga Hibriyohanon 9:27

Kinahanglan mapatay anay ka isa an tagsatagsa na tawo homan hokman siza nan Dios.

Mga Hinang 17:31

Kay siza naggahin na nan adlaw kon kon-o niza hokmi an kalibotan somaya sa katarongan, pinaagi sa isa na tawo na iza tagpili para nan ini. Sanan ini iza tagpamatood ngadto sa tanan mga tawo pinaagi nan pagbanhaw diza gikan sa mga patay.

24 AN TAGHATAG NA TABANG NI HISO-KRISTO

I Pidro 5:5b

... Kontra nan Dios an mga mapagarbohon piro tabangan niza an mga mapaobsanon.

II Mga Taga-Korinto 8:9

Kay kamo nahibayo kon ono ka dako nan tabang na taghatag nan ato Ginoo na Hiso-Kristo; na bisan matood kon dato siza, nahinang siza na pobri para dize dakan pinaagi sa iza pagkapobri kamo mangadato.

Mga Taga Roma 5:15

Piro an taghatag na tabang nan Dios na wayay bazad lain ra karazaw sa kalapasan nan tawo. Kay kon mahamok an nangama-

tay tongod sa paglapas na nahinang nan isa na tawo na si Adan, labaw pa gazod an taghatag na tabang nan Dios sanan an taghatag na kalooy nan isa na tawo na si Hiso-Kristo.

Mga Taga-Roma 9:16

Ogsa nag-agad baza ini dili sa pagboot nan tawo kon sa iza paningkamot, kondili sa kalooy nan Dios.

Mga Hinang 4:33

Homan, iban sa dako na gahom, an mga sinaligan ni Kristo namagpamatood nan pagkabanhaw nan Ginoo na Hisos, sanan dako an taghatag na panabang did-on dila tanan.

Mga Hinang 3:19

Ogsa maghinolsol kamo, sanan mobalik na kamo diza dakan mapaya an izo mga saya, dakan an mga panahon sa kahayahay moabot digo gikan sa atobangan nan Dios.

Mga Hinang 17:30

An Dios, waya lamang niza tagda an mga nangagi na panahon nan izo pagkawayay kahibayo mahitongod sa kalowasan pinaagi kan Kristo, piro koman tagsogo niza an tanan mga tawo bisan diin paghinolsol.

II Mga Taga-Korinto 7:10

Gosto nan Dios na an tawo na nakasaya kinahanglan may kina-

singkasing na pagbasol na nagdaya nan paghinolsol niza. Marazaw ini kay makalibri ini sa tawo nan silot nan iza saya. Homan, kon an tawo na nakasaya kon dili maghinolsol silotan siza hangtod sa kahangtoran kay bisan kon may pagbasol siza waya siza maghinolsol kon magbiza sa saya.

Homan, si Pidro notobag dila na Paghinolsol kamo, sanan pabawtismo kamo an kada isa digo sa ngayan ni Hiso-Kristo kay timaan ini sa kapasaylohan nan izo mga saya; homan, madawat nizo an hatag na amo an Ispirito nan Dios. —Mga Hinang 2:28

Tagpakita 3:20

Tan-awa nagtindog ako sa logwa nan izo sira sanan pirmi nagtoktok; kon may manalinga sa ako tingog sanan moabri nan sira, mosoyod ako diza sanan makig-sayo ako pagkaon iban diza, sanan siza iban dako.

Markos 2:5

Homan, pagkakita ni Hisos nan ila pagsalig, nolaong siza sa paralitiko na Anak, an imo mga saya tagpasaylo na.

Izikil 18:21

Piro kon an mayaot na tawo mobiza sa tanan niza na mga saya na iza taghinang, sanan mag-toman sa tanan ko na balaod,

sanan magbatasan sobay sa balaod sanan matarong siza, sa pagkatinood mabohi siza, dili mapatay.

Isayas 55:7

Pabizai nan mayaot na tawo an iza batasan; sanan nan tawo na dili matarong an iza mga pangisip; sanan pabalika siza kan Jehova kay kaloozan siza; sanan sa ato Dios, kay siza labaw gazed na mopasaylo.

Matiyo 6:14

Kay kon mopasaylo kamo sa mga tawo nan ila mga paglapas, pasaylohon isab kamo nan izo langitnon na Ama.

AN PAGBIZA NAN KAHILAYAN NAN KALIBOTAN 27

Tito 2:11, 12

Kay an kalooy nan Dios na naghatag nan kalowasan tagpakita sa tanan tawo. Ini nagtoon dato sa pagbiza nan pagkadili diosnon sanan nan mga pangibog na kalibotanon; hinoa kinahanglan magbatasan kita na may pagpogong sa kaogalingon, matarong sanan diosnon dinhi nan ini na kalibotan.

Isayas 1:16

Pamati kamo, panhinlo kamo, ipalazo an izo mga mayaot na hinang gikan sa atobangan nan ako mga mata; honong na maghinang nan mayaot.

Mga Taga-Ipiso 5:11

Homan azaw kamo pag-ambit nan mga dili mabongahon na hinang nan kadogyom hinoa ipakita nizo ini.

I Howan 2:15, 16

Azaw nizo kayozaga an kalibotan, bisan an mga botang did-on sa kalibotan. Kon may nayozag nan kalibotan, waya did-on diza an pagkayozag nan Ama. Kay an tanan na ad-on sa kalibotan, an pangibog sa onod sanan an pangibog sa mga mata sanan an pagpagarbo sa kinabohi, dili kon gikan sa Ama kondili sa kalibotan.

I Howan 2:29

Kon izo man ogaling nahibayo-an na siza matarong, na, nahibayo-an baza nizo na an tanan na naghinang nan matarong tagpanganak gikan diza.

Howan 3:3

Homan, si Hisos notobag diza na Tinood gazod, maglaong ako dimo, gawas kon an tawo ianak pag-otro dili siza makakita sa hoyanan nan Dios.

I Pidro 1:23

Kamo tag-anak pag-isab ogsa may bag-o na kamo na kinabohi. Ini dili kon gikan sa izo tawhanon na mga giniklanan kay an kinabohi na gikan dila madonot ra.

Kondili ini na bag-ong kinabohi na wayay pagkadonot gikan ini kan Kristo na amo an bohi sanan nagpadazon na solti nan Dios.

I Howan 5:18

Nahibayo kita na an tawo na taghinang nan Dios pagbag-o dili makapadazon pagpakasaya kay tagbantazan siza nan Bata nan Dios. Homan dili siza mahilabtan ni Satanas.

II Mga Taga-Korinto 5:17

Kay pagpasakop nan tawo kan Kristo nagkaisa na siza sanan si Kristo. Tagbag-o na nan Dios an iza kinabohi. Nawaya na an daan kinaiza niza kay taghatagan na siza nan bag-o na kinabohi.

PATAY SA SAYA — NABANHAW KAN KRISTO 29

Siza gazod mismo amo an no-daya sa ato mga saya did-on sa iza lawas ngadto sa kros dakan mapatay kita ngadto sa saya sanan mabohi ngadto sa pagkamatarong. Pinaagi sa iza mga samad kamo nangadazaw. —I Pidro 2:24

Mga Taga-Galasya 5:24

Homan, an mga inangkon ni Kristo Hisos naglansang na nan ila kaogalingon na lawasnon na mga kayozag didto sa kros daya an mga mayaot na tozo nan ini paghinang nan saya.

Mga Taga-Kolosas 3:1

Nan pagkabohi ni Kristo gikan sa pagkapatay tagbanhaw isab kamo nan Dios kaiban ni Kristo.

Ogsa maghona-hona kamo pirmi mahitongod sa Dios na naghoya sa langit diin adto si Kristo nag-inkod sa too nan Dios.

Mga Taga-Ipiso 2:1 sanan 6

Homan, kamo iza tagbohi kaiban kan Kristo nan mga patay pa kamo did-on sa saya....Sanan nobanhaw dato kaiban diza sanan nagpaingkod dato kaiban diza sa mga langitnon na dapit pinaagi kan Kristo Hisos.

Mga Taga-Roma 6:2

Ogsa kamo isab kinahanglan mag-isip nan izo kaogalingon na mga patay na sa paghinang nan saya, piro did-on kan Kristo Hisos mga bohi kamo ngadto sa Dios.

Howan 17:3

Homan, amo ini an kinabohi na wayay kataposan, an ila pagpakakilaya dimo na amo an isa ra na tinood na Dios, sanan kan Hiso Kristo na imo tagpadaya.

Mga Taga-Roma 6:23

Kay an sohol gikan sa saya amo an kamatazon na wayay kataposan piro an wayay bazad na hatag gikan sa Dios amo an kinabohi na wayay kataposan did-on kan Kristo Hisos na ato Ginoo.

Howan 3:14, 15

Ogsa singod na an hayas tagpa-taas ni Moises didto sa kamingawan, amo isab na kinahanglan ipa-taas an Tawo na noona sa bisan

sin-o na ona na tawo dakan an tanan na mosalig diza makaangkong nan kinabohi na wayay kataposan. An mosalig sa Bata nan Dios may kinabohi na wayay kataposan, piro an dili mosalig sa Bata nan Dios dili makaangkong nan kinabohi, hinoan an kapongot nan Dios ad-on diza.

Howan 5:24

Tinood, Tinood gazod, maglaong ako dizo, na an manalinga sa ako tagsolti sanan magtoo diza na nagpadaya dako, may kinabohi na wayay kataposan; siza dili na hokman hinoan, mabalhin na siza gikan sa kamatazon ngadto sa kinabohi.

Mga Taga-Galasya 4:6

Tongod kay kamo mga anak man, tagpadaya nan Dios an Ispirito nan iza Bata dinhi sa ato mga kasingkasing, na nagtawag diza na Ako Ama.

Howan 14:21

An nag-angkon nan ako mga sogo sanan nagtoman nan ini, ini siza amo an nayozag dako; sanan an nayozag dako kaangazan isab nan ako Ama, sanan ako mayozag diza, sanan magpakilaya ako sa ako kaogalingon didto diza.

I Howan 3:18, 19

Mga anak! Kinahanglan tinood gazod an ato pagkalooy sa mga tawo, dili kon mga solti ra

lamang. Ipakita ta ini nan mga marazaw na hinang. Kon amo ini an ato kinaiza mahibayo kita na an sinodlo nan Dios amo an tagtoman ta. Homan wayay pagdohadoha ta na tagkoha na nan Dios an ato mga saya.

I Howan 4:13

Makapanigoro kita na nagkaangay na kita sanan an Dios nan pangisip sanan nakigkaiban na siza dato kay taghatagan kita niza nan iza kaogalingon na Ispirito.

Mga Taga-Roma 8:16

An Ispirito gazod amo an nagpakilaya iban sa ato ispirito na kita mga bata nan Dios.

32 SI KRISTO NA NAGHOYA SA SOYOD NAN ATO KINABOHI AMO AN NAGHATAG NAN KALIPAY

Taglang-an ko kamo nan ini dakan mapono kamo nan ako kalipay sanan wayay makalabaw nan izo kalipay. —Howan 15:11

Howan 17:13

Piro koman mokaton na ako dimo, sanan mahamok an mga tagsolti ko dila dinhi sa kalibotan dakan maangkon gazod nila an arang ka dako na kalipay.

Mga Tag-Galasya 2:20

Taglansang ako sa kros iban kan Kristo; dili na kon ako an nabohi, kondili si Kristo an nabohi dinhi sa soyod nan ako kinabohi. An tinood na kinabohi na koman ako tagkinabohi sa lawas ako ini

naangkon gikan sa ako pagtoo sa Bata nan Dios, na nalooy dako sanan nohatag sa iza kaogalingon pagsalinti dako.

Salmo 16:11

Ipakita mo dako an dayan sa kinabohi: Sa Pagpakig-iban dimo ad-on an hingpit na kalipay; sa imo lozo ad-on an mga kalipay na wayay kataposan.

Mga Taga-Roma 14:17

Kay an labaw na tagkinahanglan dato na mga anak nan Dios dili kon pagkaon kon imnonon, kondili pagkamatarong sanan kalinaw sanan kalipay didon sa Ispirito nan Dios.

AN PAGTOMAN SA GINOO TAGKINAHANGLAN 33

Mga Taga-Roma 2:13

Kay dili kon an mga nanalinga ra sa balaod amo an matarong sa atobang nan Dios, kondili an mga nagtoman nan kasogoan amo an tagkilaya na matarong.

II Mga Taga-Tisalonika 1:7-9

Homan iban damo, kamo na may mga kasakit makapahoway ra kon an Ginoo na Hisos inibanan nan kyazo na naglaga ipakita na gikan sa langit inibanan na iza gamhanan na mga anghil. Siza manimayos dila na waya makakilaya nan Dios sanan dila na

waya magtoman nan mga sinodlo mahitongod sa ato Ginoo na Hisos. Mahiagom ra sila sa silot nan kamatazon na wayay kataposan sanan paiwaton sila gikan sa atobangan nan Ginoo.

Mga Taga-Roma 6:16

Nahibayoan nizo na kon magpaolipon kamo kan bisan sin-o, olipon kamo niza; kon nagsilbi kamo sa saya, olipon kamo nan saya sanan mosangpot ini sa kamatazon. Kon magmasinogtanon kamo sa Dios, iza kamo hinangon na matarong.

34 AN PAGSOGID KAN KRISTO TAGKINAHANGLAN

Lokas 9:26

Kay bisan sin-o an masipog pag-pakilaya dako sanan nan ako mga solti, ikasipog isab siza ni Kristo pag-abot niza didto sa iza himaya sanan sa himaya nan iza Ama sanan nan mga balaan na mga anghil.

Mga Taga-Roma 10:9, 10

Kay kon gikan sa imo ba-ba mosogilon kaw sa iban na si Hiso-Kristo amo an imo Ginoo sanan magtoo sa ilayom nan imo kasing-kasing na siza tagbanhaw nan Dios gikan sa mga patay, na, malowas kaw. Kay gikan nan pagtoo sa iza kasingkasing an tawo malowas; sanan gikan sa iza

ba-ba magsogilon siza sa iban mahitongod sa iza pagtoo, na nag-pamatood sa iza pagkalinowas.

Matiyo 10:32, 33

Ogsa bisan sin-o an mokilaya dako sa atobang nan mga tawo, kilay-on ko isab siza sa atobang nan ako Ama na ad-on sa langit; piro bisan sin-o an dili mokilaya dako sa atobang nan mga tawo, dili ko isab siza kilay-on sa atobang nan ako Ama na ad-on sa langit.

Mga Taga-Pilipos 2:11

Sanan an tanan dila mosogilon na Ginoo si Hiso-Kristo, para sa pagdazig nan Dios na Ama.

I Pidro 5:8

Magmalinawon kamo sa izo pangisip, magbantay kamo, an izo kaaway na amo an zawa naglibot-libot singod nan liyon na nagngoyob na naghanap nan iza matokob.

Mga Taga-Ipiso 6:11

Isokbot nizo an tanan na armas nan Dios, dakan makaaslang kamo pag-ato nan mga malimbonon na panintal nan zawa.

Matiyo 4:1 sanan 10:11

Homan, si Hisos taghasod nan Ispirito ngadto sa mga awaaw dakan tintalon nan zawa... Notobag si Hisos na naglaong na Iwat did-on, Satanas! Kay may

nahisoyat na naglaong na Amoy simbaha an Ginoo na imo Dios, sanan siza lamang an silbihan mo. Homan, an zawa noiwat diza sanan may mga anghil na noabot pagsilbi diza.

Mga Hinang 26:18

... Dakan makasabot sila sa ila tinood na kahimtang, dakan sila mobiza sa saya sanan magkinabohi did-on sa Dios, dili na kon sa ilayom nan madogyom na pagdomaya nan Zawa, dakan mapasaylo an ila mga saya sanan makadawat sila nan bahin nan mga kabilin nan mga nahinloan na nan ila mga saya, gikan sa ila pagtoo dako.

I Howan 3:8

Piro kon an tawo nagpadazon sa iza pagpakasaya, nagpakilaya lamang ini na sakop siza nan zawa, na nagpakasaya sogod pa nan sinogdan. Piro an Bata nan Dios nokanhi pagdaog nan mga hinang nan zawa.

Mga Taga-Roma 8:35 sanan 37

Sin-o ba an makapaboyag dato gikan sa kayozag ni Kristo? An pag-antos ba, kon kasakit, kon an paglotos, kon an gotom, kon an pagkawayay masokbot, kon an kalisdanan, kon an hinagiban ba? . . . Dili, kay bisan pa kon nag-agi kita nan ini na mga kalisod,

labaw pa kita nan mga mananaog gikan diza na nalooy dato.

Santiago 4:7, 8a

Ogsa magpasakop kamo na masinogtanon sa Dios; piro atohi nizo an zawa, kay ini siza mopaspas pagdyagan gikan dizo. Apiki kamo sa Dios kay siza moapiki dizo.

II Mga Taga-Tisalonika 2:8

Pagkahoman, an Tawo na Masinopakon mokanhi, sanan patazon siza nan Ginoo na Hisos gikan nan iza paghozop, sanan mawaya ini gikan sa kapawa nan iza pag-abot.

AN KAYOZAG AMO AN SOKOD NAN ATO PAGKASINALIGAN

37

Kita nahibayo na kita nakadoot na gikan sa kamatazon ngadto sa kinabohi, tongod kay kita nalooy man sa mga lomon. Siza na waya malooy nagpabilin pa gihapon sa kamatazon. —I Howan 3:14

I Howan 4:20

An bisan sin-o na nolaong na nayozag siza sa Dios homan nagdomot sa iza kaiban bakakon siza. Kay onhon man niza pagkayozag nan Dios na waya niza makita kon waya siza mayozag sa iza kaiban na nakit-an niza?

Mga Taga-Galasya 5:22, 23a

Piro kon an Ispirito amo an maghari sa ato mga kinabohi siza

an magpabonga dinhi dato nan pagkayozag, kalipay, kalinaw, pailob, pagkamatinabangon, pagkamarazaw, pagkamasinogtanon, pagkamaloloy-on sanan pagpongong sa kaogalingon.

Nolaong siza diza pag-otro na Simon, bata ni Howan, nayozag ba kaw dako? Notobag siza diza na, Oo Ginoo, nahibayo kaw na nayozag ako dimo. Nolaong siza diza na Ariglaha an ako mga kar-niro. —Howan 21:16

Howan 13:35

An tanan tawo makakilaya na kamo mga sakop ko kon kamo magkinaloy-anay sa isa sanan isa.

Mga Taga-Roma 4:25

Nagpakamatay siza pagsalinti dato tongod sa ato mga saya sanan nabohi siza pag-isab dakan kita mahinang na mga matarong sa atobangan nan Dios.

Howan 20:26-28

Wayo ka adlaw tapos nan ini, an iza mga sinaligan didto na isab sa soyod nan bayay, sanan si Tomas did-on iban dila. An pirta sinirahan ini, piro si Hisos no-tonga sanan notindog did-on sa ila tonga, na naglaong na An kalinaw mag-iban dizo. Homan nolaong siza kan Tomas na Ihikap diri dako an imo todlo sanan tan-awa

an ako mga alima; ipaabot diri an imo alima sanan ipasoyod ini sa ako kilid. Azaw na nan iton pagkawayay pagtoo, hinoa magmatinoohon kaw. Homan, si Tomas nolaong diza na Ginoo ko sanan Dios ko.

Mga Hinang 10:39-41

Homan kami amo an tistigos nan tanan na taghinang niza didto sa kalopaan nan mga Hodiyo sanan sa Hirosalim. Sanan siza ila tagpatay gikan nan pagbitay diza did-on sa kahoy. Piro tagbanhaw siza nan Dios sa ikatoyo na adlaw sanan tagtogot na siza ipakita, dili ngadto sa tanan mga tawo kondili dinhi damo na tagpili nan

Dios na mga tistigos, na nangaon pagkahoman siza mabanhaw gi-
sanang naninom kaiban diza kan sa mga patay.

AN PAGKABANHAW AMO AN ATO LABAW 39

GAZOD NA PAGLAOM

II Mga Taga-Korinto 4:14

Na, amo nahibayoan na an nagbanhaw nan Ginoo na Hisos magbanhaw isab damo iban kan Hisos sanan magdaya damo iban dizo ngadto sa atobang niza.

Howan 5:25 sanan 28, 29

Tinood, tinood gazod, maglaong ako dizo, na an oras omabotay na. Ngani ini na koman, na an mga patay makabati nan tingog nan Bata nan Dios; sanan an manalinga mabohi... Azaw kamo magkaboyong nan ini, kay an oras

noabot na na an tanan na ad-on sa mga lobong makabati sa iza tingog. Sanan an mga naghinang nan marazaw manlogwa na binanhaw ngadto sa kinabohi; sanan sila na naghinang nan mayaot manlogwa na binanhaw ngadto sa pagkasinilotan.

Matiyo 16:21

Sogod nan adto na panahon tag-sogdan ni Hisos pagpasabot an iza mga tinon-an na kinahanglan mokadto siza sa Hirosalim... sanan patazon siza, homan sa ikatoyo na adlaw mabanhaw siza.

40 AN PAGKAWAYAY SAYA NGADTO SA GINOO

Mga Hibriyohanon 12:14

Paningkamoti na malinawon an imo paghoya kaiban sa tanan tawo, sanan an wayay saya na pagkinabohi kay kon waya ini wayay bisan sin-o na makakita nan Dios.

Lokas 1:74, 75

Dakan sa pagtogot dato na kita, singod na linawas gikan sa alima nan ato mga kaaway, magsilbi kontana diza na wayay kahadlok, wayay saya, sanan matarong, sa iza pagtan-aw sa tanan mga adlaw nan ato kinabohi.

I Pidro 1:2 sanan 15

Na tagpili somaya nan nahibayoan na daan nan Dios na Ama, sanan taghinang na wayay

saya nan Ispirito dakan mahinang na masinogtanon kan Hiso-Kristo sanan binisbisan nan iza dogo; An kalooy sanan kalinaw padakoon kontana did-on dizo. . . Piro singod na wayay saya siza na nagtawag dizo, kinahanglan kamo isab wayay saya sa tanan nizo na panhingas.

Kon an isa na tawo maghinlo sa iza kaogalingon gikan sa mga botang na may ikasaway, nan siza mahinang na lon-anan para sa dongganan na kagamitan, kinohaan nan saya, sanan maposlan nan agayon nan panimayay, andam para sa tanan na marazaw na hinang. —II Timotiyo 2:21

Mga Taga-Ipiso 1:4

Sogod nan waya pa mahinang an kalibotan nopili an Dios dato dakan kita na an iza mga inanak pinaagi nan pagtoo ta kan Kristo. Homan, did-on sa pagsoyong nan Dios kita waya nay saya sanan wayay ikasaway.

Matiyo 3:11

Ako nagbawtismo digo sa tobig kay timaan ini na kamo naghinol-sol na sa izo mga saya. May moabot pa dinhi digo na labaw pa ka gamhanan kay dako, na bisan ngani an iza mga sapatos dili ako angay magbitbit. Siza an maghatag digo nan Ispirito nan Dios

sanan magpahamtang nan silot sa makasasaya na tawo.

I Howan 1:9

Kon isolti ta diza an ato mga saya, siza kasaligan sanan mata-rong magpasaylo nan ato mga saya sanan maghinlo dato gikan sa tanan na pagkadili kon mata-rong.

Isayas 35:8

Sanan may karsada na moagi ngadto sa lopa na awaaw anay; sanan ini ngayanan nan Dayan nan Wayay Saya; an mga makasasaya sanan an mga boang dili moagi nan ini; piro para ini sa mga tawo na linowas.

Mga Hinang 1:8a

Piro kamo magdawat hinoa nan gahom kon mokad-on na dizo an Ispirito nan Dios homan, kamo amo an ako mga tistigos

Nan nakaampo na sila, naho-zong an logar na tagtiponan nila; sanan sila tanan tagharian nan Ispirito nan Dios sanan tanogilon nila an Solti nan Dios na wayay kokahadlok. —Mga Hinang 4:31

Mga Hinang 11:24

Kay si Birnabi isa man ka tawo na marazaw, pono nan Ispirito nan Dios, sanan nan pagtoo. Homan, nahidogang ngadto sa Ginoo an isa ka dako na panon nan mga tawo.

Piro kamo waya na harii nan izo mga lawasnon na kayozag. Hinoa tagharian na kamo nan Ispirito kon tinood man na an Ispirito nan Dios naghoya did-on sa soyod nizo. An waya makapanag-iza nan Ispirito ni Kristo dili kon sakop ni Kristo. —Mga Taga-Roma 8:9

Mga Hinang 13:52

Homan an mga sinaligan naponon nan kalipay sanan nan Ispirito nan Ginoo.

Homan, ibotang ko an ako Ispirito sa soyod nan izo kinabohi dakan matabangan kamo pagsonod nan ako mga balaod, sanan magtoman kamo sa ako mga sogo. —Izikil 36:27

AN KAHIBOYONGAN NA MGA SAAD NGADTO 43 SA MGA KRISTOHANON

Tagpakita 21:4

Iza pahiron an tanan loha gikan sa ila mga mata, sanan waya na an kamatazon, waya na an pagkabiro, kon paghaza, kon kasakit kay ini na mga botanga nangawaya na.

I Pidro 4:12, 13

Mga pinayangga, azaw kamo magkaboyong nan mga mapait na kalisod na moabotay did-on dizo, kay amo man gazod ini an mahitabo. Magkalipay hino a kamo, kay pinaagi nan ini na mga pagsolay kamo mahinang na mga

kaiban ni Kristo nan iza pagantos, homan, magkalipay ra gazod kamo kon ipakita na an iza harianon na gahom sa iza pagbalik.

Isayas 66:2

Kay inin tanan na mga botang taghinang nan ako alima, sanan tongod nan ini an tanan mga botang nangaamo, naglaong si Jehova; piro nan ini na tawo mosoyong ako, bisan pa diza na mapaobsanon sanan may ispirito na mahinololon sanan nagpanhibig tongod sa ako solti.

44 MGA SAAD PARA SA MGA TAGTINTAL

Mga Hibriyohanon 2:18

Tongod kay siza mismo noagi man nan mga pag-antos sanan mga pagtintal, na, makahimo isab siza pagtabang dila na tagtintal.

Mga Taga-Roma 8:28

Kita nahibayo na did-on sa bisan ono na nahitabo, an Dios naghinang nan karazawan para dila na nayoza diza sanan mga tinawag pagsonod sa iza katozoan.

I Mga Taga-Korinto 10:13

Did-on dize wayay nakaabot na bisan ono na pagsoyay na dili maangot nan tawo. An Dios kasaligan, sanan dili niza itogot na

kamo pagsoyazan nan labaw sa izo maangot, piro siza mag-andam isab nan lotsanan sa paglikay, dakan kamo makaangot nan ini.

Salmo 34:19

Mahamok an mga kalisdanan nan mga matarong; piro si Jehova maglowas dize gikan nan inin tanan.

Isayas 43:2

Kon modoot kaw sa mga tobig na halayom, ako mag-iban dimo; bisan kon sa mga kasobaan, ini dili makalomos dimo; kon magpanaw kaw pagdoot sa kayazo, dili kaw masonog; An mga laga dili mosilaob did-on dimo.

Tagpakita 3:5

An magmadaogon sokbotan nan baro na poti; sanan an iza ngayan dili ko payaon gikan sa basahon nan kinabohi. Ako hinoa isogilon an iza ngayan sa atobang nan ako Ama sanan sa atobang nan iza mga anghil.

Tagpakita 3:21

...An magmadaogon togotan ko pag-ingkod sa ako trono iban dako, singod na ako isab nagma-daogon sanan noingkod iban sa ako Ama did-on sa iza trono.

Tagpakita 3:12

An magmadaogon ako hina-ngon na haligi didto sa timplo nan

ako Dios: sanan dili na siza mologwa nan ini, sanan isoyat ko did-on dizo an ngayan nan ako Dios, sanan an ngayan nan syodad nan ako Dios, an bag-o na Hirosalim na manaog gikan sa langit gikan sa ako Dios, sanan sa ako kaogalingon na bag-o na ngayan.

Tagpakita 2:7

Kinahanglan timan-an gazod pagdazaw sa mga talinga nan mga nanalinga an solti nan Ispirito ngadto sa mga sakop ni Kristo. An magmadaogon togotan ko pagkaon nan bonga nan kahoy na naghatag nan kinabohi na ad-on sa paraiso nan Dios.

46 AN DIOS NAGSOLTI DATO MAHITONGOD SA PAGKABOYAG NAN BANA SANAN ASAWA

Matiyo 5:32

Piro maglaong ako digo na an bisan sin-o na moboyag sa iza asawa, gawas kon an hinongdan amo an paghonay, naghinang diza na nakasaya nan paghonay; sanan an mangasawa nan babazi na tag-boyagan, nakapanhonay.

Mga Taga-Roma 7:2, 3

Tongod nan ini an babazi na minzo tagpasakop nan balaod did-on sa iza bana mintras bohi pa an iza bana. Piro kon mapatay an iza bana, siza malibri na gikan sa balaod mahitongod sa iza bana.

Somaya nan ini kilay-on siza na maghohonay kon makigtibo siza sa lain na layaki mintras bohi pa an iza bana. Piro kon mapatay an iza bana, mahilogwa na siza nan iton na balaod, sanan kon ma-minzo siza sa lain na tawo dili na siza makasaya nan paghonay.

I Mga Taga-Korinto 7:11

(Piro kon siza moboyag gazod, kinahanglan magpabilin siza na mag-isaisa ra: kon dili man, kinahanglan na makig-oli siza sa iza bana) sanan an bana dili gazod magboyag sa iza asawa.

AN IKADOHA NA PAGBALIK NI KRISTO

47

Matiyo 24:27

Kay singod na an kilat mokidlat gikan sa sobangan, sanan mopawa ngadto sa kasadpan, amo ra isab nan ini an pag-abot nan Bata nan Tawo.

Tagpakita 3:11

Mokaton na ako pagdali; kapti nizo pagdazaw an panolti na izo naangkong dakan wayay makailog nan imo korona.

Markos 8:38

Kay bisan sin-o an magkasipog tongod dako sanan nan ako mga solti dinhi nan inin manhohonay sanan makasasaya na kalibotan,

ikasipog isab siza nan Bata nan Tawo pag-abot niza sa harianon na hoy a nan iza Ama kaiban nan mga anghil na wayay saya.

Santiago 5:8

Kamo isab kinahanglan mag-pailob: Lig-ona an izo mga kas-ingkasing, kay apiki na an pagkanhi nan Ginoo.

Howan 14:13

Kon makakadto na ako sanan makaandam na ako nan logar para dizo, mokanhi ako pag-isab sanan dawaton ko kamo dinhi iban dako, dakan kon hain ngani ako adto isab kamo.

Lokas 12:40

Kamo isab kinahanglan man-gandam, kay an Bata nan Tawo moabot sa panahon na waya nizo honahonaa.

I Howan 3:2

Mga pinayangga ko na mga lomon, kita koman mga anak nan Dios; waya pa ipakita kon maono an kahimtang na moabotay. Piro kita nahibayo na kon mobalik na siza, kita isab mahaod diza, kay kita pirmi na man magsoyong diza.

Tagpakita 16:15

Tan-awa mokanhi ako singod nan kawatan! Malipazon an nag-paabot dako sanan nagbantay sa

iza mga baro dakan dili siza magpanaw na maghobo sanan masipgan.

Lokas 21:27

Homan, ila makit-an an Bata nan Tawo na moabot na sinaugga nan mga panganod inibanan nan dako na gahom sanan harianon na kapawa.

Homan nolaong dila, Mga tawo na taga-Galiliya, ono man na nagtindog man kamo dinhi na nagsoyong sa langit? Inin si Hisos na tagkoha gikan digo sanan tagdaya pasingod sa langit, mobalik ra sa amo ra na paagi nan izo nakita nan iza pagpanik sa langit.
—Mga Hinang 1:11

AN SOLTI NAN DIOS

Salmo 119:105

An imo mga tagsolti singod nan lamparahan na naghatag nan kapawa sa ako agihan dakan dili ako mahigomad.

Matiyo 22:29

Piro notobag si Hisos dila na naglaong na Nangasazop kamo kay waya kamo makasabot nan kasoyatan kon gahom nan Dios.

Lokas 21:33

An langit sanan lopa manga-wayay, piro an ako mga solti dili gazod mawayay.

II Timotiyo 3:16

An tibook na Kasoyatan taghatag nan Dios pinaagi sa iza

pagtandog nan honahona nan iza mga tagpasoyat, sanan maposlanon ini para sa pagpanoon, pagpamalandong, pagpanol-id nan batasan sanan pagmatoto nan pagkamatarong.

II Pidro 1:21

Kay wayay propisiya na noabot pinaagi sa pagboot ra nan tawo; An Ispirito nan Dios sa ilayom nan mga diosnon na mga tawo amo an nagsolti nan mga tagsolti nan Dios.

Salmo 119:11

An imo solti tagtagoan ko sa soyod nan ako kasingkasing dakan dili ako makasaya dimo.

Published in numerous languages by World Missionary Press as God supplies funds in answer to prayer. If you would like more copies for careful distribution, please write to us in English.

World Missionary Press, Inc.
P.O. Box 120
New Paris, IN 46553-0120 USA